



Nol jere nie di fâ, par Clementina al jere antipatic. E jere chê che e odeave di plui il nestri Dree. E jere di Milan, plene di caghe. Jessint fie di un militâr e jere vignude a stâ tal Friûl des grandis casermis. Si jere iscritte a la Scuele dal Grant Pindul, la orende scuele di mumiis, come che le clamave il nestri Dree: scuele plene di bidei mutilâts e alcolizâts e professôrs cagons. Se no tu jeris de creme di Udin, fi di cualchi miedi, avocât o nodâr, tu partivis za in svantaç. Ma ce jerial lâta a fâ ta chê scuele li il nestri Dree, fi di operaris, brut, plen di bruscs, vistût mâl, cui dincj in disordin e i ocjâi di Nicola di Bari?

Al veve veleitâts di diventâ gjornalist. Al veve ancje dât un esam supplementâr di latin par podê iscrivisi ma... nie di fâ, une batoste daûr di chê altre: -1, -2, INCLASSIFICABILE... la uniche suficiencia le veve in religjon!

Clementina e jere bielina, riçote e castagnole, cu lis orelis un pôc a la Spock. E flirtave cul plui biel de scuele, Zuan, che al faseve ancje l'atôr.

Une di te ore di sience e jere vignude fûr la storie dal ses. Dree al veve 14 agns ma al jere une vore indaûr e nancje svilupât. Nol saveve nie di nie e ducj lu coionavin, massime Clementina che e jere intun banc dongje di lui. Ancje il professôr si jere mitût a ridi viodint la ingjenuitât dal zovin ocjalon.

Di tantis che i à ditis Clementina a chel puar frut lui, arcistuf, al à alçât la man par domandâ al prof "Posso uscire?"

La lengate de fantate di Milan i à dât a Dree il colp dal K.O. disintji a basse vôs... "Sì, sì, vai a farti una sega..." e dongje ducj a sgavarâ.

Puar Dree lu cjatarin pôcs minûts daspò: si jere butât jù pal barcon di tante vergogne. Dôs

oris plui tart al murive tal ospedâl.

di Checo Tam

Note

(Ogni riferiment a personis o acjadiments reâi al è dal dut un câs)